

To'on yó'o kían kúú onì nì taa San Juan

Ká'an Juan ndisá'an

1 ¹ Yu'u kúú nà sá'ano, ta ká'an yu'u ndisá'an xí'ín yo'ó, Gayo, ñani manì. Mí'an ndaa ndisa kú'u nda'o iniì sa'on. ² Ñani manì, xíkaj noo Ndios ña daá keva'on tein ndidaá kúú ña'a kéeón, ta daá kuití ná koo va'a inon táto'on kì'o va'a nímon noo Ndios. ³ Nì kadij nda'o iniì tá nì kixi dao ñani yo kuendá Jesús, chì nì nakani na xí'ín ña in nda'on xí'ín ña ndaa kándisa yó. ⁴ Ta koó iin ka ña'a xí'o ña kadij cháa ka iniì táto'on kì'o kadij iniì tá ní'ì to'in ña ndíta ndaa de'i kuendá Jesús xí'ín ña ndaa kándisa yó.

Va'a va kée Gayo, chì nátiin va'a ra nà kúú kuendá Jesús ve'e ra

⁵ Ñani manì, va'a va kéeón tá chindeéón ndidaá ñani yo, ta va'a cháa ka kéeón tá kéeón dión xí'ín nà ko ná'ón. ⁶ Ta nà yó'o kúú nà xí'o kuendá noo nà kúú kuendá Jesús ndéi yó'o ña kú'u nda'o inon sa'a ná. Ta va'a keeón tá chindeéón nà xí'ín ndá ña'a xínñó'ó ná noo ko'on nà, chì kì'o dión kánian kee yó xí'ín ná sa'a ña kéchóon na noo Ndios, dá kuu ko'on nà dao ka xían. ⁷ Chì sa'á ña kóni nà Jesús, sa'á ñoó nì kankuei na xionoo na dána'a nà, ta ko kí'in ya'i ta'on na noo ñayuu ko ná'á Ndios. ⁸ Sa'á ñoó kánian kì'o yó ña'a xínñó'ó ná, ta kì'o dión chindeé yó nà noo dána'a nà to'on ndaa sa'a Jesús.

Naá iin ra naní Diótrefes xí'ín Juan

⁹ Sa nì taa yu'u iin tuti kosaa noó nà kúú kuendá Jesús ndéi xaan, tído ko xí'ín ta'on Diótrefes kueídó'o ra choon sa'ándá ndu, chì kóni mií rá ka'anda ra choon. ¹⁰ Ta sa'á ña kée ra dión, sa'á ñoó tá ná saai, dá ka'in xí'ín rá, dá chì xionoo ra ká'an ndava'a ra sa'a ndú'u. Ta ko ndínoo ini ra xí'ín ña yó'o oon ni, chì dión ta'ani ko kóni ra natiin va'a ra ñani yo, nà xionoo dána'a to'on Ndios. Ta ko sónó rá ña natiin va'a ñaá dao ka ñani yo. Ta kúú táxí rá nà ká'an natiin va'a ñaá.

Va'a ká'an Juan sa'a iin ra naní Demetrio

¹¹ Ñani manì, o sa kóo inon keeón ña kini kée dao ka ñayuu. Di'a koo inon keeón ña kúú ña va'a. Chì nà kée ña va'a kúú kuendá Ndios, ta nà ko kée ña va'a, noón kúú nà ko ná'á Ndios. ¹² Ta ndidaá kúú nà kúú kuendá Jesús xí'o na kuendá sa'a iin ka taa naní Demetrio ña kúú rá taa va'a, ta mí'an ndaa ndisa dión kían. Nda ndu'u xí'o kuendá ña taa va'a kúú rá, ta sa ná'á vá míón ña kuendá xí'o ndu'u kúú ña ndaa.

Ká'án Juan ndisá'án noo ndí'i xí'ín Gayo

- ¹³ Kua'á nda'o ña'a ió ka'in xí'ón, tído kō kóni taai ña noo iin tuti,
¹⁴ chi ndáti kiii konii yo'ó, ta kantó'ón yú'í xí'ón.
¹⁵ Ta ná koo va'a inon kee Ndios. Ta ká'án na né'e tá'an va'a xí'ón ndéi yó'o ndisá'án xí'ón. Ta keeón ña maní ka'on ndisá'án xí'ín iin rá iin na né'e tá'an va'a xí'ín ndu'u ndéi xaan.